

Friday, September 5, 2025

Time - 2:30pm - 2:35pm



TEACHERS DAY MESSAGE

School Education Minister Dr Vanlalhlana'n zirtirtute chu ruihhlo laka fihlim turin a chah.

Akashvani Aizawl kaltlanga Zirtirtute Ni puala a thuchahah Dr Vanlalhlana chuan Zirtirtu hna chu hna thianghlim a ni a ti a, zirlaite mai bakah mipui vantlang tan pawha entawn tlak leh mi rinawm ni turin a ngen tih a sawi a ni.

(BYTE –Education Minister)

Dr Vanlalhlana chuan Mizoram sorkarin zirna tihhmasawn nan theihtawp a chhuah chho mek a, kum 2024-25 chhung khan sikul 68 leh office building sak that leh thuam that a ni a ti a, Disaster Mangement & Rehabilitation Department puihna in sikul 434 leh subordinate office thuam that nan, Cyclone Remal Daamages Relief Fund vbc 3 chuang hmanral a ni bawk a ti a ni.

Dr Vanlalhlana chuan Zirtirtu indaihlohna phuhruk turin theihtawp an chhuah a ti a, an sorkar atangin, school education department chuan casual teacher primary school 648, middle school 371, high school zirtirtu 350 leh Higher Secondary School Lecturer 50 lak a ni tawh a ti a, primary school casual teacher 234 lakbelhna tur pawh buaipui mek a ni, a ti bawk.

Zirtirtu natna khirhkhan tuarte tanpuina tur National Foundation for Teachers Welfare fund a zirtirtute sum thawhkhawm atangin nikum sept thla atanga – kumin august thla thleng khan zirtirtu 153 hnenah cheng nuai 25 sing 6 tanpuina pekchhuah a nih thu a sawi bawk.

Dr Vanlalhlana chuan kuminah National award dawng tur zirtirtu an awm lo tih sawiin, pawl a tih thu a sawi a, Mizoram sorkarin mi 3 a rawt chungin kuminah dawng thei an awm lo a ti a, hei hi a chhan chu documentation uar tawh loh vang a ni a ti a, evidence, document leh thlalak thlenga vawn that anih thin loh avangin zirtirtu ten an phu tawh chawimawina an hmuh loh phah thin a, hemi kawngah hian tan lak thar a pawimawh thu a sawi bawk.



PM VISIT

Bairabi - Sairang inkar rel kawng chu karleh Inrinni khian Prime Minister Pu Narendra Modi chuan Aizawl Lammual atangin a hawng dawn a; Prime Minister rawn zin tur atan hian Mizoram sorkar chuan venhimna lam leh lirthei tlan dan turah ruahmanna hrang hrang a siam.

Prime Minister-in rel kawng a hawn tur kaihnawihah hian hun hmanna tur Lammualah hmunhma siam hna thawh mek a ni a, Lammual chhunga hmunhmate pawh rawng hnawih thara chei thar mek niin Lammual chhungah hian mipui tan luh phal a ni tawh lo a, a chhunga programme hmanna tur buaipuitute pawh uluk taka endik thin niin, Lammual chhunga hnathawkte chet velna zawng zawng pawh CCTV hmanga vil reng a nih thu SP chuan a sawi.

Aizawl District Magistrate Pu Lalhriatpuia chuan thupek tichhuakin, September 13, Inrinnia Prime Minister-in Lammual atanga Bairabi-Sairang inkar rel kawng a hawn tur chu tluang taka neih a nih theih nan leh tha taka venhimna kalpui a nih theih nan September ni 4 atanga ni 15 chhung hian Aizawl district chhungah remote control hman drone emaw, hetiang lam chi reng reng thlawhtir leh hman khap a nih thu a puang a; thupek bawhchhia an awm a nih chuan dan hmangin hrem anni dawn a ni.

Traffic Sr. SP Pu Ruatsanga Ralte pawhin Prime Minister lo zin turah hian Aizawl khawpuiah lirthei chetvelna a khaihlak châng a awm dawn tih tarlangin lo inhmakhua turin Aizawl mipui a ngen a, Pu Ruatsanga chuan, karleh Inrinnia lo zin tur Prime Minister leh sorkar mi pawimawhte chuanna lirthei chu Falkland peng atanga Bawngkawn - Chanmari - Treasury Square - Sikulpuikawn inkarah an tlan dawn avangin darkar 2/3 vel helai kawng hi khar a ngai maithei niin a tarlang a; mipui kea kal leh lirtheia veivak thinte chu hun an sen thlawn loh nan lo inhmakhua a, pumpelh dan kawng zawng tur leh lirtheia veivak tam lo turin a ngen bakah, Thuampui leh Sikulpuikawn inkar kawngpui dungah lirthei, bungrua leh thil dang dah hnawh phal a nih loh thu a tarlang bawh.

ICT Secretary leh Census Operations Director Amit Sharma chuan Pu Amit Sharma chuan Rel kawng chu engkim peihfel thawkhat ani a ti a, inbuatsaihna chak taka kalpui niin karleh ni 13-a Prime Minister Narendra Modi in a hawn theih turin department hrang hrang chak takin an inbuatsaih a ti a, tluang

taka rel a tlan nghal thei nan engkim inbuatsaih a ni tih sawiin Mizo mipuite beiseina chu a takin hmuh theih ani thuai dawn tih a sawi.

Pu Amit Sharma chuan Mizoram ei leh bar kawnga hmasawwna leh dinhmun chawi kang tu a nih ngei a beisei a ti a, hmun dang nena inthlunzawmna pawimawh tak ani dawn tih a sawi bawk.



MRB DONATES

Mizoram – a Branch ngah ber, Mizoram Rural Bank chuan nimin khan ‘Zirtirtute Ni’ pualin School hrang hrangah tanpuina an pe.

Mizoram Rural Bank hian Mizoram a thlanbik school hrang hrang 53 thilpek an pe a. Thilpek inhlanna hmunpui ber Mizoram Rural Bank Head Office Board Room a neihah School Education Department Director Pi Angela Zothanpuui chuan hmanpuuin Aizawl khawpui chhunga school 17 ah thilpek hlan an ni.

Mizoram Rural Bank hian August ni 31, 2025 thleng khan cheng Vaibelchhia 9,883 business pumpui belhkhawmin a nei mek a. School naupangte leh anmahni duhsaktute avangin PMJDY Account pawh 3,14,000 chuang zet an nei a. CD Ratio hi 65% a ni mek. Education Loan hi mi 180 chuang hnenah pek tawh niin cheng Vaibelchhia 5 chuang zet a ni tawh a ni.



PMMVY

Lawngtlai District-a Pradhan Mantri Matru Vandana Yojana (PMMVY) kalpui mekah ni 10 chhung awh PMMVY hmalakna inzirtirna leh Smart Phone sem chhuahna neih mek a ni a; nimin khan Sangauah ICDS project CDPO Pi F Lalnuntluangi’n Anganwadi Wokers mi 52 hnenah Smart Phone a sem.

Pi F Lalnuntluangi chuan Anganwadi Workers-te chu an Smart Phone dawnte Poshan Tracker leh nau neih tanpuina (PMMVY) khawihna atan tangkai taka hmang turin a chah a ni.

ICDS, Lawngtlai hian tunkar kalmekah Anganwadi Woker mi 302 hnenah smartphone hi an sem tawh a; karleh lamah Bungtlang South huam chhunga Anganwadi Worker 60 hnenah an sem chhunzawm leh dawn a ni.

